

**REGULAMENTO DO CONSELLO MUNICIPAL DE MEDIO AMBIENTE.
(incluíndo modificación acordada polo pleno na sesión ordinaria do día 16 de xuño de 2016)**

ARTIGO 1.- CREACIÓN

Créase o Consello Sectorial de Medio Ambiente do Concello de Santiago de Compostela, coas atribucións, estrutura e funcionamento determinados no presente acordo.

ARTIGO 2.- ÁMBITO.

As funcións a desenvolver polo Consello Municipal de Medio Ambiente circunscribíense territorialmente ao termo municipal de Santiago de Compostela.

ARTIGO 3.- NATUREZA.

O Consello Municipal de Medio Ambiente é un órgano colexiado de participación, de carácter complementario, establecido en base ás previsións que sobre participación cidadá nos asuntos municipais dispón o artigo 71 da Lei 5/97 do 22 de xullo, da Administración Local de Galicia, os artigos 1 e 69 da LRBRL e na restante normativa de ámbito estatal e local, nomeadamente no Regulamento de Participación Cidadá do Concello de Santiago de Compostela; sen prexuízo do exercicio das facultades de decisión dos órganos representativos regulados por lei.

De conformidade coas determinacións legais citadas no parágrafo anterior e nos artigos 130 do R.D. 2568/1986, de 28 de novembro, polo que se aprobou o Regulamento de Organización, Funcionamento e Réxime Xurídico das Entidades Locais (ROF), e no Título IV do Regulamento de Participación Cidadá, terá carácter consultivo e asesor nas materias relacionadas co medio ambiente. En consecuencia, configúrase como órgano permanente de participación, asesoramento, consulta, proposta, información, comunicación e debate.

ARTIGO 4.- FUNCÍONS.

As funcións do Consello Municipal de Medio Ambiente serán as seguintes:

1. Servir de canle de participación e diálogo dos interlocutores sociais no desenvolvemento da política ambiental do Concello de Santiago, en orde a acadar acordos ao respecto.
2. Propoñer aos órganos municipais competentes criterios de actuación na liña do desenvolvemento sostíbel e participar no seguimento da xestión municipal.
3. Informar e ser informado sobre temas específicos do sector e propoñer alternativas concretas aos problemas existentes na área de medio ambiente para que sexan tratados polos órganos municipais competentes.
4. Ser informado dos dictames aprobados polas respectivas comisións informativas, e das resolucións e acordos do Alcalde, Pleno e Comisión de Goberno, respecto daqueles temas relacionados co seu obxecto específico.
5. Emitir informes, por iniciativa propia ou do Concello, sobre materias da súa competencia.
6. Emitir e formular propostas e suxerencias en relación co funcionamento dos servizos e organismos públicos municipais correspondentes.
7. Presentar iniciativas, propostas ou suxerencias ao Concello, para ser discutidas nas comisións informativas municipais correspondentes.
8. Constituírse en órgano de consulta nos procesos de elaboración das disposicións normativas de ámbito municipal neste eido e, en xeral, nos asuntos de transcendencia para o medio ambiente do Concello.
9. Elaborar anualmente, dentro do primeiro semestre de cada ano, unha memoria-informe da súa actuación.
10. Establecer canles de relación con outras administracións e organizacións relacionadas co medio ambiente.

ARTIGO 5º.- ESTRUCTURA.

O Consello Municipal de Medio Ambiente do Concello de Santiago de Compostela estará formado polos seguintes órganos: Pleno, Presidente, Vicepresidente e Secretario.

Así mesmo, poderanse constituír comisións de traballo, encargadas de preparar e desenvolver os traballos do órgano plenario do Consello.

ARTIGO 6º.- PLENO.

O Pleno é o supremo órgano de decisión e formación da vontade do Consello. Estará integrado polos seguintes membros:

-Presidente: O Alcalde-Presidente da Corporación ou membro da Corporación en quen delegue.

-1 Vicepresidente, elixido entre a representación das asociacións ecoloxistas.

-5 representantes da Corporación Municipal, atendendo á proporcionalidade da representación de cada un dos grupos municipais.

-3 técnicos do Concello de Santiago de Compostela.

-3 representantes dos grupos ecoloxistas do Municipio de Santiago de Compostela.

-2 representantes de grupos de defensa dos animais.

-1 representante de asociacións de consumidores.

-3 representantes de asociacións veciñais, a proposta do Consello Municipal de Relacións Veciñais.

-1 representante de asociacións xuvenís.

-3 representantes de seccións ambientais de sindicatos de traballadores.

-3 representantes de sindicatos agrarios.

-2 representantes da Universidade de Santiago de Compostela.

-2 expertos en temas medioambientais, designados polo Pleno da Corporación.

-2 representantes da Consellería de Medio Ambiente.

Os membros do Pleno do Consello serán nomeados ao principio da lexislatura e para a duración desta, podendo cada unha das partes designar titulares e suplentes así como efectuar substitucións dos designados, ao longo do seu mandato.

Os membros do Consello Municipal de Medio Ambiente que o sexan en virtude da representación que ostentan, perderán a condición de tales no momento de cesaren como representantes dos seus respectivos colectivos.

Asimesmo poderá participar, con voz pero sen voto, no Consello Municipal de Medio Ambiente calquera persoa física maior de 16 anos ou xurídica que previamente o solicite ao Concello de Santiago, presentando no Rexistro Xeral, no prazo de 3 meses contados a partires do día seguinte á sesión constitutiva, escrito dirixido ao Concelleiro de Medio Ambiente e Convivencia, ao que se acompañará:

- *No caso de persoas físicas, certificado de empadramento no Concello de Santiago.*
- *No caso de persoas xurídicas, acreditación do domicilio social no Concello de Santiago.*

Ás sesións do Pleno do Consello Municipal de Medio Ambiente poderán asistir aqueles especialistas, técnicos e personalidades que se considere necesario. A súa participación será con voz pero sen voto”.

ARTIGO 7º.- PRESIDENTE.

O Presidente do Consello Municipal de Medio Ambiente será o Alcalde-Presidente da Corporación ou membro en quen delegue. Terá como atribucións propias as seguintes:

- Ostentar a representación do Consello.
- Acordar a convocatoria das sesións ordinarias e extraordinarias e fixar a orde do día, tendo en conta no seu caso as peticións dos demais membros formuladas por escrito e coa suficiente antelación.

- Presidir as sesións, moderar o desenvolvemento dos debates e suspendelos por causas xustificadas.
- Dispoñer o cumprimento dos acordos do Consello.
- Autorizar coa súa sinatura os acordos do Pleno do Consello Municipal de Medio Ambiente.
- Exercer cantas outras funcións sexan inherentes á súa condición de presidente.

ARTIGO 8.- VICEPRESIDENTE.

Será Vicepresidente do Consello Municipal de Medio Ambiente un membro do mesmo da representación ecoloxista, elixido polo propio Consello Municipal de Medio Ambiente. Será función exclusiva do Vicepresidente, ademais das funcións que lle corresponden como vocal do Consello, auxiliar ao Presidente do Consello nos asuntos que este requira.

ARTIGO 9º.- SECRETARIO.

O Secretario do Consello Municipal de Medio Ambiente será o da Corporación ou funcionario no que delegue. Terá, entre outras atribucións, a de preparar as ordes do día, realizar as correspondentes convocatorias, levantar acta das sesións dos órganos do Consello Municipal de Medio Ambiente, custodiar as mesmas, expedir certificacións dos acordos adoptados e aquelas outras que sexan propias do seu labor de Secretario, de acordo coa lexislación vixente. Asistirá ás reunións do Pleno e das Comisións de Traballo do Consello Municipal de Medio Ambiente con voz pero sen voto.

ARTIGO 10º.- COMISIÓNS DE TRABALLO.

De existiren, estarán integradas polo Presidente e, como mínimo, cinco membros designados polo Pleno do Consello, coa asistencia do Secretario. Delas formarán parte necesariamente un representante de cada un dos grupos políticos presentes na Corporación.

Os acordos nas Comisións adoptaranse por consenso e, de non ser isto posíbel. trasladaranse ao Pleno do Consello todas as propostas existentes, indicando en todo caso os apoios de cada unha delas.

ARTIGO 11º.- RÉXIME DE SESIÓNS.

O Pleno do Consello Municipal de Medio Ambiente reunirse, en sesión ordinaria, alomenos unha vez cada tres meses e, con carácter extraordinario, previa convocatoria do Presidente ou solicitude por escrito e coa debida antelación da terceira parte da totalidade dos seus membros.

ARTIGO 12º.- FUNCIONAMENTO.

O funcionamento do Consello rexerase pola normativa prevista para os órganos colexiados na Lei de Réxime Xurídico das Administracións Públicas e do Procedemento Administrativo Común. O voto dos membros do Pleno do Consello será persoal e indelegable, recoñecéndose o dereito dos discrepantes a formular votos particulares que deberán xuntarse á resolución correspondente.

ARTIGO 13º.- ADOPCIÓN DE ACORDOS.

Os acordos adoptaranse por maioría de votos. O voto do Presidente nos casos de empate non terá carácter dirimente.

ARTIGO 14º.- SEDE.

A sede e lugar de reunión do Consello Municipal de Medio Ambiente será, en principio, a Casa do Concello.